



MOMENTO ACTUAL E SERVIZOS QUE OFERTARÁ FIARE BANCA ETICA

Fiare son as siglas da "**Fundación Inversión e Aforro Responsable**" (Fiare) que é unha fundación sen ánimo de lucro creada no ano 2002 por 62 organizacións de cooperación e reinserción social para fundar un banco social e alternativo en Euskadi, e que se convertiu nunha **iniciativa en rede a nivel estatal**. Dende o ano 2005, Fiare estaba funcionando cun contrato de axente exclusivo de **Banca Popolare Etica, S. Coop.** (BpE, Banca Etica) no Estado español. Nestes momentos estamos nun **proceso de integración** con esta cooperativa de crédito **para constituír unha cooperativa de crédito común entre Italia e o Estado español (Fiare Banca Etica)**.

No proceso actual estanse unindo capital e bases sociais. Ao longo do ano 2013 conformarase a nova estrutura territorial e organizativa de Fiare Banca Etica, resultante da adaptación ao formato da BpE. Na asemblea de Fiare Galiza, do día 19 de xaneiro de 2013 celebrada en Teo, formáronse os dous Grupos de implantación territorial (GIT) de Galiza (**GIT Galiza Norte e GIT Galiza Sur**), que serán os **órganos de coordinación no territorio galego**.

Fiare Banca Etica ofrecerá unha alternativa moi esperada a miles de persoas en Galiza, defraudadas coas prácticas da banca tradicional, ou que queremos unha entidade que cumpra todas as funcións básicas da banca -depósitos, domiciliacións, transferencias, pago con tarxeta-, pero coa máxima transparencia e coa seguridade de que o noso diñeiro non alimentará procesos especulativos nin servirá para financiar proxectos escasamente éticos. Non só iso, os cartos que xa manexa e manexará Fiare Banca Etica serve para financiar cada ano moitos proxectos ligados á economía social, á agricultura ecolóxica, á cooperación ao desenvolvemento ou á actividade produtiva de cooperativas.

Porque Fiare **leva anos funcionando como entidade financiadora de proxectos transformadores**, sendo nos últimos tempos de gran axuda para moitas cooperativas ou pequenas empresas. Esta necesidade púxose claramente de manifesto ultimamente, neste momento en que o acceso ao crédito de moitas persoas e organizacións viuse severamente restrinxido e no que o número de solicitudes de financiamento que recibiu Fiare aumentou moi significativamente.

Aclarando preguntas frecuentes...

Cando comezará a operar plenamente como entidade de banca ética?

Calcúlase que no **primeiro semestre de 2014**. Nun primeiro momento ofrecerá servizos para as **súas persoas socias e só despois abrirase para todos/as posibles clientes/as**. Desde Fiare Banca Etica animase a todas as persoas que estean interesadas a facerse socias nestes meses previos. En primeiro lugar para evitar unha avalancha no día no que se comece a operar plenamente, pero sobre todo para fortalecer e acelerar o proceso. Digamos que canto máis xente participe e canto máis se implique, antes se completarán todos os pasos. E tamén para garantir que o proxecto de Fiare Banca Etica sexa o máis plural posible, pois todas as persoas socias teñen capacidade de decisión en todos os ámbitos.



Até agora a cooperativa actúa como intermediaria entre os solicitantes de crédito e a propia operativa bancaria, que conta con **tres oficinas no Estado (Bilbao, Barcelona e Madrid)**. Xa se poden facer depósitos nunha conta corrente e son estes depósitos os que financian a concesión de créditos. Fiare Banca Etica leva anos traballando neste proceso con moito coidado e con moito detemento e nunca prestou máis diñeiro do que tiña e tentou acomodar a súa estrutura á súa actividade. Se nos axudas a construír Fiare Banca Etica avanzaremos máis rápido.

Terei todos os servizos que me ofrecen o resto de entidades bancarias?

A partir do momento no que se completen os trámites administrativos pendentes Fiare Banca Etica ofrecerá os mesmos servizos que calquera banco, aínda que cunhas diferenzas moi claras en canto ao carácter ético dos seus investimentos e créditos concedidos -destinados a cooperativas e á economía social-, á súa transparencia e ao seu non ánimo de lucro. Será esencialmente un **banco online** que permitirá realizar **depósitos, domiciliacións, transferencias e pago con tarxetas**, ademais da oferta de créditos a proxectos que xa realiza. Nunca ofrecerá un tipo de interese polos depósitos de aforro tan elevado como o que ofertan as entidades tradicionais, xa que Fiare Banca Etica non especula nin participa en mercados secundarios e non inviste en actividades como armamento, empresas contaminantes... que son as que aportan os maiores beneficios. Ademais sempre se prioriza fixar o interese menor posible para as solicitudes de crédito fronte a remunerar o aforro con intereses atractivos. O que si ofrece é a garantía dos aforros ata os 100.000 € como calquera outro banco e as súas actividades estarán baixo a supervisión do Banco de Italia e o Banco de España.

De feito, xa na actualidade os depósitos están garantidos a través das achegas das persoas socias. Temos recollidos uns 4 millóns e medio de euros, en capital social, que están totalmente inmovilizados. Os préstamos que ofrece Fiare Banca Etica saen do aforro que achegan os/as clientes/as, non dese fondo de garantía composto polas achegas das persoas socias. **No ano 2012 recolleemos 34 millóns de euros en aforros e prestamos 31 millóns**. Ese tres millóns de euros de diferenza tamén nos van servir de colchón. Nunca imos especular co diñeiro. Nunca imos prestar máis do que conseguimos.

Fiare Banca Etica busca ofrecer un equilibrio entre manter os actuais servizos da banca, aínda que sexa de maneira máis limitada, pero dirixindo o foco cara á función social que quere cumprir. Ninguén se vai facer cliente de Fiare Banca Etica porque lle vaíamos ofrecer máis servizos ou máis intereses que outros bancos. Os/as clientes/as de Fiare Banca Etica serano por un convencemento ético, por transparencia e por seguridade. De feito, de entre os [tipos de produtos de aforro](#), ofrécese a posibilidade de contratar unha libreta chamada "libreta Redes" na que os intereses que xere o diñeiro depositado vaian directamente para o sector que nós elixamos de entre os 4 aos que presta financiamento Fiare Banca Etica: agroecoloxía, educación e cultura, inclusión social, cooperación internacional-comercio xusto.

Terá oficinas en Galiza?

Nun comezo non. Será esencialmente unha **banca electrónica** (on line), que utilizará a mesma operativa que na actualidade empregan as caixas rurais e que se inserirá en Servired para que os/as clientes/as de Fiare Banca Etica poidan facer uso desta rede de caixeiros.

Na actualidade Fiare Banca Etica conta con **tres oficinas, en Bilbao, Barcelona e Madrid**.



Tamén dispón dunha ampla **rede de puntos de difusión** a través de todos os colectivos que a conforman en Galiza, 34.

E ducias de **puntos de información**, onde unha rede de axentes que nestes momentos están a recibir formación poderán asesorar sobre todos os trámites que se queiran realizar a través de Fiare Banca Etica. Está prevista a creación da figura do/a “**banqueiro/a ambulante**”, estendida xa por Italia: unha persoa con capacidade para completar todas as operacións e que se desprazará polo territorio.

Que tipo de proxectos financia Fiare Banca Etica?

Os catro principais ámbitos de actuación de Fiare Banca Etica son proxectos vinculados á:

- **transformación no campo dos valores e a educación,**
- **inserción social e laboral das persoas,**
- **agroecoloxía,**
- **comercio xusto e cooperación norte-sur.**

Desde que en 2005 comezou a ofrecer créditos o volume de cartos prestados a este tipo de proxectos de economía social -cun límite máximo de tres millóns de euros por proxecto- non deixou de crecer. A pesar da crise económica, o crédito total aprobado pasou de 19,5 millóns de euros a finais de 2010 a máis de 27,5 a finais de 2011 e superou os 32 millóns en 2012.

Cal é o obxectivo de Fiare Banca Etica?

Fiare Banca Etica é unha iniciativa de banca ética que, cunha clara **vocación transformadora**, aspira a ser un instrumento político eficaz no ámbito da intermediación financeira.

Capta aforro para prestalo, quitándolle o valor mercantil asociado a ese proceso; é dicir, canaliza, a través do aforro, solidariedade cidadá para garantir a través do crédito, condicións de equidade. Faino poñéndose **ao servizo das organizacións** que teñen percepción e capacidade para identificar cales son os **contextos de inxustiza estrutural** que hai que atender.

A actividade económica e financeira non é neutral e mostra disto é que a banca convencional está a financiar proxectos que enriquecen a unhas poucas persoas e empobrecen á maioría. Do que se trata é de crear unha ferramenta que xurda da propia sociedade para darlle a volta e que os proxectos que se financien sexan de rexeneración e de transformación social real. Esa é a diferenza fundamental.

Como se conceden os créditos?

Fiare Banca Etica fai públicos os seus obxectivos éticos e sociais en todo momento e tamén os criterios que valora á hora de conceder os créditos, entre os que o respecto ao medio ambiente, a creación de postos de traballo en ámbitos como a prestación de servizos ou actividades produtivas, ou a propia natureza non lucrativa dos proxectos son fundamentais.

Os proxectos son avaliados localmente polas comisións de avaliación ético-social, formadas por persoas socias elixidas asembleariamente e que cumpren unha serie de requisitos: manter o



equilibrio rural-urbano, de xénero, e representar as distintas sensibilidades que conforman Fiare Banca Etica. Este grupo ten un protocolo e analiza o proxecto.

Se a comisión di que o proxecto non segue os criterios de financiamento acordados no eido ético-social, entón a proposta pódese modificar. Mais se a comisión “di que si”, a operativa bancaria terá que analizar o proxecto no tocante á viabilidade económico-financeira e decidir a súa concesión.

A comisión de avaliación é fundamental en Fiare Banca Etica porque está formada por persoas que coñecen o tecido social e organizativo do territorio e polo tanto os criterios de valoración son moi axustados á realidade de cada territorio.

Hai Concellos adheridos a Fiare Banca Etica?

Polo de agora son 25 en todo o Estado, un deles en Galiza: Manzaneda. As administracións públicas locais fanse socias de Fiare Banca Etica como mostra do compromiso en construír unha banca ética desde a cidadanía organizada que impulsa unha intermediación financeira baseada nuns valores como a responsabilidade, a solidariedade e o respecto pola contorna. Donostia, Rentería, Ordizia, Azpeitia, Hernani, Oñati (Euskadi); Burlada, Ansoain, Berriozar, Villaba, Huarterpa (Navarra); Prat de Llobregat, Sabadell, Cambrils (Catalunya); RivasVaciamadrid (Madrid) ou Albuixech (Valencia) son algúns deles.

Que diferenza Fiare Banca Etica doutras entidades de banca ética?

A diferenza doutras entidades como Triodos Bank, Fiare Banca Etica é unha cooperativa nas que as persoas que achegan o capital social pasan a ser **socias de pleno dereito** e teñen dereito a voto con independencia da cantidade do seu capital. En asembleas decídense as **escalas salariais** das persoas liberadas (sendo a diferenza entre o menor e o maior de 1 a 3) e as persoas que ocupan algún **cargo de responsabilidade** (cunha limitación de 3 anos prorrogables a un máximo de 6). Iso significa que Fiare Banca Etica en Galiza non ten sentido sen eses 34 colectivos e esas máis de 320 persoas que a conforman. Polo tanto isto obriga a que todas as grandes decisións teñen que se adoptar a través dunha asemblea e toda a súa actividade está permanentemente exposta.

Que relación hai entre Fiare Banca Etica e Coop 57 ou AIS O Peto?

Son parte do mesmo proceso. Coop 57 e AIS O Peto están integradas tamén como socias en Fiare Banca Etica e realizan unha serie de funcións fundamentais que Fiare Banca Etica non pode cumprir. **No eido das finanzas éticas atopamos tres niveis -micro, medio e macro-** que funcionan dentro do mesmo proxecto, autonomamente pero complementándose uns cos outros.

O nivel micro corresponde a microproxectos, como os que xestiona O Peto. Se alguén necesita 1000 euros, iso Fiare Banca Etica non o pode facer porque a avaliación que tería que facer para decidir se financia o proxecto se cadra xa custa tanto como o que se está a solicitar. Pero AIS O Peto é socia de Fiare Banca Etica e Fiare Banca Etica “derivalle” esa solicitude.

O mesmo se pode dicir de Coop 57, xa nun nivel medio: son volumes de financiamento máis pequenos que Fiare Banca Etica -Fiare Banca Etica dá créditos de até 1 millón e Coop57 de até 200 mil euros- e tes que ser persoa socia para que optar á concesión dun crédito.



Como facerse socio/a?

Achega de **capital social**: persoas físicas, mínima de 300 €; persoas xurídicas, mínima de 600 €; empresas, concellos... mínima de 1800 €.

Achega de **fondos adicionais para gastos de constitución** do proxecto (fondo perdido): a partir de 30 € as persoas físicas, e a partir de 300 € as persoas xurídicas.

Onde atopar Fiare Banca Etica no Sur de Galiza (Pontevedra e Ourense)?

Fiare Banca Etica Galiza ten como reto para os vindeiros meses consolidar a súa implantación territorial e conta con presenza en sete cidades galegas (Vigo, Coruña, Pontevedra, Compostela, Lugo, Ourense e Ferrol). O enderezo electrónico do Grupo de Iniciativa Territorial (GIT) Galiza Sur é galizasur@proyectofiare.com. Tamén podes acudir presencialmente aos seguintes puntos de información:

- **En Vigo**: no local de Árbore (Rúa Arquitecto Pérez Bellas 5) os martes pola tarde (primeiros e últimos de cada mes) de 18:00 a 20:30 h e os mércores pola mañán de 11:30 a 13:00 h.
Correo do Grupo Local de Vigo: grupovigo@fiaregz.com.
- **En Ourense**: no local de Vento do Sul (Rúa da Paz 12) en horario de tenda (luns a venres, de 10:00 a 14:00 h e de 17:00 a 20:30 h, os sábados de 11:00 a 14:00 h).
O enderezo electrónico do Grupo Local de Ourense é grupoourense@fiaregz.com
- **No Carballiño**: no Cineclubes Carballiño (Auditorio Municipal) todos os venres ás 19:30 h.
- **En Pontevedra**: no local de Amarante-Setem (Rúa Conde San Román 9) de luns a venres de 11:00 a 13:30 h e de 17:00 a 20:00 h.
O enderezo electrónico do Grupo Local de Pontevedra é grupopontevedra@fiaregz.com

Onde atopar Fiare Banca Etica no Norte de Galiza (Coruña e Lugo)?

Fiare Banca Etica Galiza ten como reto para os próximos meses consolidar a súa implantación territorial e conta con presenza en sete cidades galegas (Vigo, Coruña, Pontevedra, Compostela, Lugo, Ourense e Ferrol). O enderezo electrónico do Grupo de Iniciativa Territorial (GIT) Galiza Norte é galizanorte@proyectofiare.com. Tamén podes acudir presencialmente aos seguintes puntos de información:

- **En Santiago de Compostela**: no local de Panxea (Rúa da Rosa 36 baixo) os martes de 17:15 a 20:30 horas e en grupocompostela@fiaregz.com.
- **En Coruña**: grupocoruna@fiaregz.com.
- **En Lugo**: grupolugo@fiaregz.com.

Texto baseado no artigo de Marcos Pérez Pena: [“Dez cousas que deberías saber sobre Fiare”](#) publicado o 28 de marzo de 2013 en www.el-diario.es.